

Membentuk Sikap Hormat

Jika kita ingin anak kita menjadi insan yang memiliki sikap hormat, kita harus mengajarkan prinsip moral kehormatan dalam bentuk sikap dan tindakan yang spesifik dan jelas. Berikut adalah tujuh langkah dalam membentuk asas prinsip kehormatan :

1. Hormati harga diri dan martabat setiap individu.
2. Layani orang lain dengan sikap baik, sopan-santun dan beradab.
3. Hormatilah adat resam dalam masyarakat, serta kepercayaan dan tradisi yang penting bagi orang lain.
4. Layani orang lain seperti layaknya diri sendiri ingin dilayani.
5. Menerima dan bertoleransi terhadap perbezaan dan menilai orang lain berdasarkan tingkah laku dan kemampuannya, bukan berdasarkan agama, ras, etnik dan faktor-faktor lain.
6. Hormatilah hak orang dewasa serta keinginan remaja yang sedang meningkat dewasa untuk mengendalikan dan mengarahkan kehidupan sendiri.
7. Hindari penggunaan perkara-perkara yang bertentangan dengan agama atau kepercayaan kepada bomoh atau dukun, serta pertahankan diri dari penggunaan kekerasan yang tidak sepatutnya.

Seterusnya, kita akan membincangkan setiap langkah bagi konsep di atas.

Hormati Harga Diri dan Martabat Setiap Individu

Kita harus mendidik anak-anak kita tentang asas kehormatan adalah penghargaan atas harga diri setiap manusia dan bahawa kesejahteraan setiap manusia adalah kewajipan moral yang penting.

Kita juga harus mendidik mereka bahawa manusia bukanlah benda yang dapat digunakan, dimanipulasi, dieksploitasi atau dimanfaatkan untuk kesenangan dan keuntungan orang lain. Setiap manusia mempunyai harga diri. Oleh kerana itu, insan yang berbudi akan melayan setiap orang dengan sikap hormat.

Anak-anak juga harus mengembangkan sikap hormat dalam diri sendiri sehingga mereka akan dihormati oleh orang lain dan menghindari tindakan yang merendahkan atau merusak diri sendiri.

Anak-anak yang dididik untuk memerhatikan dan menghargai kelebihan orang lain, bermurah hati, berbelas kasihan dan penuh rasa empati dalam menilai orang lain akan lebih mudah menghormati serta menerima kekurangan orang lain. Di pihak lain, anak yang dibesarkan dalam suasana penuh kritik dan selalu dicari kesalahannya, serta diajar secara sinis tentang sifat manusia, akan susah untuk menghormati orang lain dan tidak mempunyai model atau contoh ikutan dalam kehidupan mereka.

Namun, sebagaimana sering dikatakan oleh anak remaja, ada saja orang tidak kira dewasa mahupun remaja yang "bodoh" atau "kurang ajar". Kita tidak mampu menuntut anak-anak untuk menghormati setiap orang yang dia kenal. Sikap hormat dan kekaguman harus diraih dengan usaha. Selain itu, setiap manusia, walau bagaimana sifat peribadinya harus dilayani dengan hormat, malah terhadap orang yang pernah melakukan kejahatan sekalipun.

Contoh menunjukkan pembunuh bersiri, misalnya, telah ditolak hak mereka untuk diperlakukan dengan hormat akibat daripada kejahatan yang pernah mereka lakukan. Namun, jika itu benar, bukan bererti kewajipan kita untuk melayan mereka dengan baik dan hormat terhapus begitu sahaja. Kewajipan itu tidaklah berdasarkan hak mereka, tetapi berdasarkan rasa tanggungjawab kita untuk menjadi manusia yang lebih baik daripada mereka.

Dalam sebuah perbincangan politik yang mulai berubah menjadi hangat, seorang ahli berkata, " Tuan, saya akan melayan anda sebagai seorang gentleman. Bukan kerana anda gentleman, tetapi kerana saya yang gentleman". Apabila kita memperlakukan orang lain tanpa sikap hormat, bererti kita telah merosakkan akhlak kita sendiri.

Kita harus memperlakukan orang lain dengan hormat, bukan kerana siapa dia atau kerana kedudukannya, tetapi kerana siapa kita dan keinginan kita untuk menjadi insan yang kita

inginkan. Rasa kemanusiaan kitalah, dan bukan atas rasa kemanusiaan orang lain yang harus kita tegaskan ketika kita memperlakukan setiap manusia dengan sikap hormat.

Shahrin berusia 17 tahun dan teman-temannya sering mengejek-ejeknya kerana dia masih teruna. Mereka berkata bahawa kehilangan teruna adalah langkah awal menjadi lelaki dewasa. Zaimah, salah seorang temannya, mengatakan bahawa sepupunya, Saliha akan datang berkunjung. Kata Zaimah, Saliha agak gemuk dan tidak begitu cantik, tapi dia masih anak dara. Kata Zaimah, dia akan mengaturkan pertemuan mereka berdua. Saliha curiga tentang pertemuan itu adalah bertujuan untuk seks semata-mata dan dia tidak ingin melakukan hubungan seks dengan Shahrin. Namun, ketika Shahrin menelefonnya, Saliha setuju untuk bertemu denganya asalkan Shahrin mengajaknya ke suatu pertunjukan muzik serta makan malam yang mahal.

Shahrin dan teman-temannya memperlakukan Saliha hanya sebagai objek seks, sebuah jalan bagi Shahrin untuk menghilangkan terunanya. Ini adalah contoh ekstrem pelanggaran prinsip kehormatan. Namun, Saliha juga bersalah. Dia bermaksud menggunakan Shahrin sama seperti Shahrin ingin mempergunakannya. Baik Saliha mahupun Shahrin tidak menghormati harga diri dan martabat masing-masing.